



# Aklarashon riba e formulario di petishon pa un pèrmit di instalashon

## Servisio pa Planifikashon Urbano

Plasa Horacio Hoyer 19  
tel. 4612199; fax 4612697  
email: rop.info@gobiemu.cw

pa trabounan i otro tipo di aktividatnan den un área di  
preservashon (artíkulo 9, insiso 4) òf un área pa parke (artíkulo 10,  
insiso 3) di EOP.

Pa sierto trabounan, ku no ta trabou di konstrukshon i otro aktividatnan den un área di preservashon òf un área pa parke mester di un asina yamá pèrmit di instalashon. Sin un pèrmit di instalashon no por realisá e trabou i/o aktividatnan aki. Tampoko ta pèrmití pa desviá di e kondishonnan preskribí den e pèrmit di instalashon. *Adelantá* mester hasi un petishon korespondiente.

Por entregá un petishon pa un pèrmit di instalashon **por eskrito** na ROP hasiendo uso di e formulario athunto. E petishon mester kontené tur informashon i dokumentonan nesario pa por hasi un bon evaluashon.

Aplikashon di un pèrmit di instalashon ta hasi posibel pa atendé nos áreanan di preservashon i di parke ku mas kuidou. Esaki ta na nos tur su interes pasobra ta trata aki di áreanan vulnerabel.

A. Na promé lugá mester por indiká ki **derecho** tin riba e tereno ku ke bai desaroyá (sea ku e ta privá, di hür, na èrfpagt òf si ta trata di un tereno pa kual tin un konvenio di maneho). Ta supliká pa entregá e pruebanan korespondiente.

B. Si akaso e informashon ta disponibel, enserá un bon **deskripsjon di e tereno**. Indiká pues kual ta e karakterístikanan di e sitio, p.e. su flora i fauna i karakterístikanan natural ku ta resaltá manera roi, seru i kueba. Esaki ta yuda ROP pa atendé bo petishon ku mas diligensia.

E base pa por otorgá òf rechasá e pèrmit i pa por stipulá e kondishonnan ta e baloman partikular den e área manera e vegetashon, karakterístikanan di paisahe i e animalnan ku t'ei presente i otro puntonan di importansha manera e fluho di awa riba tera, inklinashon di seru, posibilitat di eroshon, èts. Esaki ta importante pa evaluá si por pèrmití e trabounan i/o aktividatnan i si t'asina, bou di kua kondishon. Mester evaluá ku e aktividat òf e trabounan no tin konsekuensia sea direkto òf indirekto ku lo hasi daño na e baloman eksistente di naturalesa, di historia, di kultura i/òf di paisahe òf na e posibilitat pa reskatá e baloman aki. Si e daño kompará ku e interes metí ku realisashon di e aktividat i e trabounan ta disproporshonal, mester rechasá e petishon pa e pèrmit di instalashon. E kondishonnan den e pèrmit di instalashon semper lo tin komo meta pa limitá e daño aki mas tantu posibel.

Den tur kaso mester disponé di un **mapa** mas eksakto posibel di e área riba un eskala di p.e. 1 : 10.000 i/òf mapanan detayá di e área unda ta bai desplegá sierto aktividat riba un eskala di p.e. 1 : 5000. Ta di sumo importansha ku e mapanan ta duna un bon bista di e área den su totalidat i di e sitionan unda ta bai hasi algu.

Por kumpra e mapanan aki na ROP (ubikashon di e área den eskala di 1 : 1000 riba un A-4 ta kosta NAf. 10,-; mapanan di EOP ta kosta ± NAf. 9,50 i kopia di mapanan topográfiko ta kosta maksimal NAf. 15,-). Nos ta suplika pa entrega e **tres kopia di e mapanan**.

C. Na di tres lugá mester duna un **deskripshon** mas detayá posibel di e trabounan i aktividatnan ku ke realisá. Mester di un pèrmit di instalashon pa e siguiente aktividatnan i trabounan:

1. trabou di mina, koba, halsa, egalísá òf di eksploshon;
2. instalashon òf enduresimentu di kamindanan sea pa medio di asfalt òf di otro material i otro forma di enduresé tereno pafó di kurá di edifisionan;
3. instalashon di konstrukshonnan bou òf riba tera, instalashon di artefakto o aparatonan pafó di kurá di edifisionan;
4. trabou i aktividatnan ku por influenshá situashon di e fluho di awa den i riba tera i e nivel di awa den tera;
5. instalashon di tur tipo di waf i lugá pa mara boto;
6. kapmentu i bashamentu abou di palu i tur sorto di mata pafó di kurá di edifisionan;
7. plantashon pafó di kurá di edifisionan;
8. instalashon di lugá pa tira sushi i metal bieu.

Ta evidente ku e trabou i aktividatnan aki en prinsipio ta regardá kosnan ku ta kuadra den un área di preservashon òf pa parke manera un trankè, ruta pa kana keiru, banki i mesa pa piknik, mirador, indikadó di kaminda, bòrchi, baki di sushi, reforestashon, èts. Tin bia ku esun ta bin e otro p.e. ora bo ke bai traha un kaminda pa yega na e sitio pa piknik, mester egalísá e suela (1), traha kaminda (2), kap palu, yerba i mata (6) i instalá konstrukshonnan riba tera (3).

Tambe por ta trata di aktividat i trabounan ku ta relatá ku konstrukshon di un edifisio manera egalisashon di e suela (1) òf trahamentu di un pasashi (2) òf kapmentu di vegetashon (6). P'esei ta konsehabel si tin intenshon di konstruí, pa indiká esaki bon kla den e petishon. Pa konstrukshon di edifisio di mes mester pidi naturalmente un **pèrmit di konstrukshon** na ROP.

En general mester duna un bon deskripshon di e sitio **unda** ke bai hasi algu (sea lokalidat, trayekto òf trasé), **kon** un ke otro lo bai keda realisá, **kuanto** aktividat i trabounan lo keda realisá, den ki **periodo i/o ku kua frekuensha**, ki **material** lo usa i kiko ta e **midinan** (largura, haltura, anchura). Ta rekomendabel pa akinan duna por eskrito mas tantu detaye ku ta posibel i pa indika un ke otro riba mapa.

No tin mester di un pèrmit di instalashon pa un simpel trabou o aktividatnan di mantenshon òf pa sierto aktividat i trabounan di menor importansha. Loke nos ta komprendé bou di un simpel mantenshon ta dependé sinembargo di e kaso spesífiko i ta p'esei ta rekomendabel en todo kaso pa tuma kontakto ku ROP promé ku kuminsá ku mantenshon. Den e plan por indiká kiko ta kai bou di mantenshon. Trabounan ku ta ripití frekuentemente por wòrdu inkluí den un solo bia den e pèrmit di instalashon.

D. For di e punto ariba menshoná ta surgi ku mester apuntá e **interes** ku tin relashoná ku realisashon di e aktividat i e trabounan deseá. Di e manera aki ta duna e motibu dikun realisashon di e aktividat i e trabounan aki ta importante.

E. Pa konkluí por nombra algun kondishon general ku ta konta pa kada pèrmit di instalashon:

1. Mester hasi uso di un mulina di betòn pa traha i basha material di betòn òf di semènt; e no tin mag di wòrdu traha riba tera.
2. Mester likidá sobrá di semènt, asfalt, desperdisio di konstrukshon i otro sushi direktamente despues ku kaba di traha.

3. Material di konstrukshon manera santu, asphalt, semènt, piedra i greistenchi mester keda wardá den lugánan será di moda ku nan no por lanta stòf i mester despachánan direktamente despues di trabou.

4. No por sende kandela abiertamente.

5. Doño di e pèrmit di instalashon mester pone esun ku ta enkargá ku realisashon di e aktividat i e trabounan debidamente na altura di e kondishonnan. E doño ta keda responsabel pa tur loke ta stipulá den e kondishonnan.

Hopi bia e pèrmit di instalashon ta bálido pa un sierto tempu i mester kuminsá den un sierto lapso di tempu ku e aktividat i e trabounan indiká den e pèrmit.

Pa tur klaridat:

No por traha sin un pèrmit di instalashon pero tampoko no mag di desviá di dje. Si esaki sosodé tòg nos tin di haber ku un infrakshon ku por wòrdu kastigá ku dos luna será òf un but di maksimal NAf. 5000,- konforme artíkulo 21 di EOP i artíkulo 32 insiso 2 di EROC. Si ripití e infrakshon e straf ta bira dòbel.

Por revoká e pèrmit di instalashon si:

- a. e petishonario a duna informashon i dokumentashon robes i inkorekto/inkompleto;
- b. no a kuminsá traha den e tempu stipulá;
- c. ta aktua empugná di e kondishonnan bou di kua a otorgá e pèrmit di instalashon.

Pa mas pregunta i akklarashon/informashon riba e pèrmit di instalashon por tuma kontakto na tur momentu ku ROP, divishon Planning & Erfgoed na number di telefòn: 433-3200, via faks: 461-2697 òf via e-mail [info.rop@gobiernu.cw](mailto:info.rop@gobiernu.cw).